

НА УТРЕНИ,

по шести псалмех, Бог Господь, на глас Осмогласника. И глаголем тропарь воскресен дважды: Богородичен единожды, и обычная стихослова. Седальны Осмогласника. По Непорочных тропари: Ангельский собор: ипакои. Степенны и прокимен гласа: Всякое дыхание: Евангелие воскресно ряду. Воскресение Христова: псалом 50.

Слава, глас 8: Покаяния отверзи ми двери Жизнодавче, утренюет бо дух мой ко храму святому Твоему, храм носяй телесный весь осквернен: но яко щедр, очисти благоутробною Твоею милостию.

И ныне, Богородичен: На спасения стези настави мя Богородице, студными бо окалях душу грехми, и в лености все житие мое иждих: но Твоими молитвами избави мя от всякия нечистоты.

Таже, глас 6: Помилуй мя Боже, по велицей милости Твоей, и по множеству щедрот Твоих, очисти беззаконие мое.

Множества содеянных мною лютых, помышляя окаянный, трепещу страшнаго дне суднаго: но надеяся на милость благоутробия Твоего, яко Давид вопию Ти: помилуй мя Боже по велицей Твоей милости.

Канон воскресен Осмогласника, со ирмосом на 4, и крестовоскресный на два, и Богородицы на два: и в Триоди на 6. Творение Георгия. Егоже краестрочие в Богородичнах: Георгия, глас 6:

Катавасия, глас 4: Отверзу уста моя:

Кондак, глас 4. Подобен: «Явился еси днесь»:

Фарисеева убежим высокоглаго́лания,/ и мытарéве научимся высоте глагол смире́нных,/ покаянием взыва́юще:/ Спа́се ми́ра,// очисти рабы́ Твоя́.

Ин кондак, глас 3. Подобен: Дева днесь:

Воздыхания принесем мытарская Го́сподеви,/ и к Нему приступим грешнии яко Влады́це:/ хочет бо спасения всех челове́ков,/ оставление подает всем ка́ющимся./ Нас бо ради воплотíся,// Бог сый Отцу́ собезначальный.